



## KREUZEVERKLOAREN

**Kreuze?** Dat is toch dat gruine spul dat op t wotter drift? Woar n onzichtboare wereld ónder zit mit gehaaimen? Woar ainden van vreten of in ronnobbern? Joa, dat is (ook) **kreuze**. Woaterplanten, Azollafamilie, hemmen we opzocht. t Is ook n bont blad, n krantje, n rondzendbraif, n grobbeltunne vol Grunnegers. Dou mor n greep, pak der mor wat oet, bewoar t, vergeet t (nait)....

**Wel?** Henk de Weerd en Jan Blaauw, mit heur baaident, eerste tied. Wie hemmen kurzus Grunnegers veur begunners doan in Noordhörn, mor kommen oorspronkelk zulf oet Pekel en Midwolle. Oost en West kommen mekoar tegemuide, en Noord, en Stad, in **Kreuze**. Wel A zegt, het haile alfabet as raive om mooie toaldingen mit te baauwen, help ons doar mor bie!

**Wat?** Van alles wat: verhoalen, gedichten, nijs, verskes, riemkes, roadsels, aanpriezens.... Wie willen aal t Grunnegers aan bod kommen loaten, mor gebruiken zulf benoam d'aigen moudertoal. Schrief je in t Hoogelandsters? Best! Westerketiers? Groag! Stad-Grunnegers? Wie lopen der nait veur vot! Gain Algemein Grunnegers, dat willen we nait, din smiet je mit t badwotter t kind weg.

**Wanneer?** Begun van moand dunkt ons, n tien moal in t joar as t aan ons ligt. Mout je ons wel mit helpen mit schriefderij en t wieder sturen van **Kreuze**.

**Woarom?** Het Grunnegers is ons dierbaar, wie willen t groag levensvatbaar holden. Joa, wie waiten ook wel dat .... Vul zulf mor in. Gain krokodilletroanen, gewoon t Grunnegers gebruiken: lezen, schrieven, proaten, luustern. Mit **Kreuze!**

## KREUZE nummer 1 1<sup>ste</sup> joargang – juni/juli 2006

**redaksie:** Jan Blaauw (tekst); Henk de Weerd (opmoak)

**redaksie-adres:** Verl.Oosterweg 33  
9804 RD Noordhorn  
0594-503095

[JanBlaauw@hetnet.nl](mailto:JanBlaauw@hetnet.nl)  
[henkdeweerd@hetnet.nl](mailto:henkdeweerd@hetnet.nl)

### **INHOLD:** **BLADZIEDE:**

Kreuzeverkloaren	1
Inhold / Nij(s)	2
Ken je dizze?/Roadsel/Opruij	3
Hooireuk – Jelte Dijkstra	3
Dansen op dien graf – Jan Blaauw	4
Identiteit – Saul van Messel	4
Zundagnoamiddag – Meinette Venema	5
DAPPER – Henk de Weerd	6
Idylle – Meinette Venema	7
Kurzus Grunnegers – Harma Lanting	8
Optaikens van n grootmoe – Giny Vonk	9
Niks gebeur en toch... - Siet Bootsman	10
Koatsebale aan Ongkool – Jan Blaauw	11
Remkes, komt der..... - M.Olle Bone	12

*Vrij rond te sturen; nait zo mor wat overnemen zunder  
toustemmen van schriefster/schriever!*

## NIJ(S)

Ien Dagblad van 29 juni stijj n berichtje over de opriching van n nij **Nedersaksisch koor**. Opriching is eiglek n potje van t Ede Staal Project, krekt ofsloten ien Veendam. Bedoulen is n nij koor, zo groot as n koamerkoor dat n hoog nivo hoalen wil en dat zingen gijj ien n Nedersaksische streektoal. Jaap Mulder is ien van de oprichters: "Wij willen veur 80 % zingen ien t Drents of t Grunnegers en veur de rest ien t Achterhoeks, Twents of Stellingwarfs." Noam van t koor is der ok al: **Nedersaksisch Vocaal Ensemble**. Der bennen tussen 16 en 36 zangers en zangeressen neudeg, met n goede belans tussen mannen en vrouwen. Herman Koster wordt de dirigent van t spul. En wat ze zingen goan? "t Wordt gien shanty- en gien amusementskoor", zegt Mulder.



## NIJ(S)

- Nije nummer van **Krödde** is oet: nr.98 zummer 2006. Nait minder din 48 bladzieden mit verhoalen en gedichten onder redaksie van Hanny Diemer, Jan Glas, Willem Hartholt en Anneke Krijgsheld. Tikwaark is van Frits Pleiter (krekt ridderd, gelok dermit, Frits!) Prachtege biedroagen van onder meer Reinder Hiemstra, Melle Hijlkema en Gerrit Wassing.
- **Krödde** kin je bekieken in biebeltaiken en op t internet.
- **Beter:** koop n **Krödde** in de winkel veur € 3,30 (lös nummer)
- **Nog beter:** neem n abonnement veur € 12,00 in t joar!
- **Email:** [info@krodde.nl](mailto:info@krodde.nl)
- **Internet:** [www.krodde.nl](http://www.krodde.nl)

## KEN JE DIZZE ?

Vattien broeslezzen Grunnegs het Eltje Doddemoa op zien webstek zet, mit as onderschrift: *hou wor k wereldkampioen Grunnegs schrieven?* Doar kin je n baarg van opsteken, opzuiken dus en aine veur aine oetstubben. Schrieven wordt der n stok makkelker van en t lezen ook. Eltje wil aiglieks mor **ain soort Grunnegs**, mor doar denken wie aans over. Wie binnen wies mit t Oldambtsters, en mit t Veenkolonioals, en mit t Grunnegs van t Hogelaand, t Westerketaaiers en zulf mit dat bobbelge Stad-Grunnegs. Doar ain pot nat van moaken is zunde. Mor van de broeslezzen kin elkenain wat leren. Doarom even kieken noar <http://home.hetnet.nl/~doddemaeltje/>.

## ROADSEL

Dij mie makt dij wil mie nait.  
Dij mie dragt dij holdt mie nait.  
Dij mie kocht dij huift mie nait.  
En dij mie het dij wait t nait.

(Bron: Giny Vonk)

## OPRUIP / OPROEP

Wie binnen op zuik noar liesten mit Grunneger noamen veur VOGELS en PLANTEN. Wie hemmen wel wat vonden bie Ter Loan, mor messchain kin je ons n baarg waark bespoaren, deurd dat je al kant en kloare liesten moakt hemmen. Bevöbbeld mit noam van de streek derbie, as dat oetzunderlek is.

Vlaamse gaai - holtoakster  
Merel - swaarte liester

Madeliefje - laandjebloom(e)

Wel helpt ons wieder op glee? Sturen groag noar t redaksie-adres. Alvast bedaankt!

## HOOIREUK

*Ruuk k weer de soete reuk uut t riek  
Van hooi en gras en witte kloaver,  
Die met de goeie westewiend  
Uut stilte voart noar t stadsgedoaver;*

*Dan is veur mij weer t groene veld  
Ien n gloed van sulverlicht verschenen;  
Dan sie k gien stroat, moar swad noast  
swad,  
En n stienen wereld is verdwenen.*

*Dan kruup k besied ien t waarme hooi,  
En dreum en kiek noar t spul van  
pluuskes,  
Die roaveln uut het wolkenwit,  
As spinsel over leege huuskes.*

*Dan rie k weer op soo'n soeikend voer,  
Met saachte schokjes deur de lannen,  
Dan sie k weer, hoe dat groen en blauw  
Ien n kanner trilt aan greide-rannen.*

*Soo'n miemerij liekt teuverij,  
En ken uut niks n wereld bouwen,  
Waar menskenhaand gien spieker slag,  
En joaren ait vegees op houwen!*

**Uut: VERZOAMELD WAARK  
Gedichten ien t Westerketiers**

**van**

**JELTE DIJKSTRA (Nikloas Griep)**

Reco Multi Media, Groningen  
2004

*n uutgoave van: Stichting 'Het  
verleden doen herleven',*

*Griepskerk*

ISBN 90 76457 13 1

### **DANSEN OP DIEN GRAF**

*Ofspraak stijt veur vandoag noteerd:  
Ik zal dansen op dien graf, solo macabre.*

*Bezörgd luuster ik noar de  
weersverwachten:  
Zwoare buien met onweer en haarde  
wiend.*

*Uut schoenenpuut op beun vis ik n poar,  
warop ik joaren leden bewoog op meziek.*

*Vergees perbeer ik ien n ien-over-twij-loa  
t laank leden aanschafte vlinderstrikje te  
vinden.*

*n Filmkluut met Gene Kelly en Stanley  
Donen  
schuuf langzaam veurbij: Singing in the  
Rain*

*As ik mij soavends tegen zonsondergang  
noar t kerkhof hoast, kieken dunderkoppen  
toe.*

*Regenjas hangt keureg over mien arm,  
plu wiest t pad noar dien grafstien.*

*Krekt as ik sierlek de begunholden  
aanneem,  
brekt t onweer lös, rolt dunder  
kundegmoakend.*

*Op mien glidderge zolen glij ik ale kaanten  
op.  
"Bravo!" ruusken van ofstand kiekende  
popeliern.*

*Ik heur van verschilnde kanten onderdrukt  
Gelag en dien stem: "Nog niks bijleerd!"*

**Jan Blaauw**  
(ongebundeld)

### **Identiteit**

mit aigen toal  
pertij aingoal  
vuilt wat ik schrief  
hou vremd ik blief

Oet: "HOU VREMD IK BLIEF"  
Saul van Messel  
Joods dichter in het Nedersaksisch  
n uitgifte van de Stichting Stellingwarver  
Schrieversronte Oosterwoolde, 1985

## ZUNDAGNOAMIDDAG (MEERT 2006)



### mien inspiroatsie

As winter wiekt

Zun komt weer veur n dag en moakt  
 Vot aal wat driester  
 Van noabers dak n glinster-glieboan  
 Doar k op sliester  
 Noar mien jeugd weerom – Mien pa pakt mie  
 ien t hof bij haand  
 en zegt: Dij vogel dij's nou heurze  
 is n liester.

(Peter Visser)

*De lucht is hoast groen – en ik buten oadem – en onnertied jakkern de loadewoagens over t laand om binnen te kriegen wat nog ien de wiers leit te wachten, veurdat t onweer lösbarst. Ik jakker noar huus om mien eigen kostboare vrachtje op tied onner dak te kriegen. De jongste hangt op t stuur te sloapen, mor de oldste ontgijt niet veul. Hij wordt angsteg as e de eerste dikke spatten voelt en moant mij aan om haarder te fietsen. Zien stemke klinkt ongerust, mor ik leid hem of deur hem te wiezen op de bedrievigheid om ons hen. De boeren bennen gek ien e kop. Het zal de leste meugelkheid wezen om nog gras ien e kuul te kriegen en de gehoaste sfeer dut hoast surrealistisch aan onner dizze hoge, dreigende lucht Wat liekt het land nieteg dan, zo vlak, zo leeg, haalf september...*

*Is het echt al n haalf joar leden dat ik mij, verleid deur de eerste prille veurjoarsstroalen, veur het eerst weer op fiets op dit zulfde pad begeef? Achter glas leek t zo mooi, mor de thermometer die dudelk nul groaden Celsius aandudt, had ik toch wat serieuzer nemen moeten. t Lutje wichtje op mien stuur slept dizze keer niet, mor kikt met bliede oogjes om zuich hen. Heur handjes kleuren blauw, blauwer.*

*Hoewel de eerste kiewieten heur opwachten al laank weer moakt hemmen, leit het ies nog op de sloten en is de wiend venieneg kold. Het korte gras wordt deur de wiend plat op t land henleit en richt zich nou en dan, host vergeefs, weer op. De vlakke van t laand is mor schien. Ien dit lege laand vallen ien de winter de hoogten en leegten des te meer op. Eeuwenold laandschap dat ooit, toen de zee heur terugtrok, deur iemege mensken zo bewaarkt werd, joar ien, joar uut, dat er*

*vruchtboare landbouwgrond veur ien t stee kwam. Mor de olle slenken hemmen heur onuutwisboare sporen achterloaten.*

*Noar Nijhoof mor. Ien de Eisseshof kenst n kopke kovvie kopen en as t geluk hest, hemmen ze der ok wel wat bij. Met dizze kolde mag je jezulf wel belonen as je de deur uitkommen en, belangrieker nog, dat lutje wichtje roakt aans stok en steen verkleumd. Ze moet eerst opwarmen, veur we weer op huus aan kunnen. Ze kan aans wel n ofkeer kriegen van fietsen met mamme.*

*Op Nijhoof aan. Op de Frytumerweg zigst aan de hoogte waarop beide boerderijen bouwd bennen, elk met de kont noar de weg, dat t n old stee is. Hoe zol t pad der uut zien hemmen, toen de eerste boeren zich hier vestegden? As ik op dizze plek aankommen ben, voel ik me aaltied ver of stoan van de tegenworege tied. Hier liekt alles zo oorspronkelk. Mor schien bedrukt, Brussel bepoalt ok veur dizze boeren of t der op of der onder wordt. Al haar n machtege haand t dörp der ok hen plempt, zo leit het der bij. Een ansichtkoart. Anton Pieck zol der niks met kend hemmen, want het dörp is niet lieflek, mor koal, stoer, zunder opsmuk, as de volksoard. Zichzulf. Loat ze ien de randstad mor niet wieten, dat hier zulke pareltjes bennen. Wel wacht der op busloadings Japanners met n gids?*

*De kaggel snort en de kovvie is goed. Het wichtje het de gelagkoamer tot heurent moakt. Heur voetjes daansen over de versleten planken, heur blauwe handjes kriegen weer heur normoale kleur. De slagroom van mames appeltoart lepelt ze tevreden op. Ze het nog gien verstaand van natuur, van landschap of oorsprong. Mor op n dag zal ik heur vertellen hoe beveurrecht ze is hiér op te groeien. Ik zal heur de liefde veur dizze omgeven bijbrengen. Veur de twee zwoanen die kroakend overvlogen, toen we op Nijhoof aanreden. “Kogel, kogel”, riep ze bliede, toen ik ze heur aanwees. Heur tied van mobieltjes, en God wiet wat nog meer, komt wel, ooit. Eerst zal ze de geneugten van dizze eenvold ervoaren.*

*Kom wicht, we goan op huus aan. De kaggel thus snort ok.*

**Meinette Venema**

(Uut: “Aigen waark”, cursus Grunneger Toal ien Noordhörn 2006)

# DAPPER

veur Stanislaw Sosabowski

zo kwammen noa joaren  
de Polen weerom  
en kregen recht  
moar luipen krom  
de doden rust  
de noamen weer schoon  
op de zaarken  
ons gewaiten sust  
en toch gain roezie met de bureen

as ze hier nou mor nait  
kommen waarken


hou laank kin oorlog duren.

*Henk de Weerd*

*5 juni 2006*

Meer dan 20  
dan toeken  
dapperen Pol  
Franciszek  
1907) was  
hij met al  
de weg te b  
troepen. De  
leevens, m  
worden fa  
Bitter gees  
Nervoor me  
ufool Sos  
shoemen. C  
omervolce  
gedwinge  
werken als  
Feldpost  
niet te. Hij  
overleed ha  
Onder ande  
Wilhelms  
hebben oic  
net oodere  
generaal. H  
yehomen, i  
de troegsch  
hadden ope  
kabinet Sos  
ondersche  
Postuum kr  
Beatrix de l  
dapperheid  
regiment, d  
Draafbank  
Parachutiet  
Militaire  
Nederlands  
onderschei  
werde heer

DE WEEK VAN STANISLAW SOSABOW



**Idylle**

***Ik spring  
hai springt  
zai springt***

***wij springen***

***springen ien t hoge gras  
springen tot de wiend ons optilt  
Lucht is hoog en laauw as aask***

***Lucht is hoog en laauw en blauw  
Wiend lispelt loom deur zulver blad***

***Boven ons de lucht  
laauw, blauw***

***droagen deur de waarme eerde  
hol ik mien oasem ien***

**Meinette Venema**

***(Uut: "Aigen waark"  
cursus Grunnger taal ien Noordhörn  
2006)***

## KURZUS GRUNNEGERS

Der wer mie vraagd, of ik n verhoal schrieven wol veur de volgende kurzusoavend. Man, ik wer der vergreld van. Wat mos ik wel opschrieven, wat zol ik bedenken? Ik zol t nait waiten.

t Valt mie nait mit om zo mor wat op te bedenken.

Ik wol den mor schrieven over mien ontdekken in t bouk "Twee eeuwen Gronings – n golden toal". Doarin las ik, dat der n Jan Boer is en n Jan J.Boer.

Veur mie is dat n haile grode verrazzen, want dat heb ik nooit waiten. Ik zag t aan de foto in t bouk. Ik heb Jan Boer n korte periode van zien leven mitmoakt en haar mie der aaltied over verwonnerd dat hai zukse doktersverhoaltjes schreven haar, om reden hai gain dokter was.


Ik heb mie voakachteg ofvraagd, hou dat wel ien mekoar zat, docht dat zien pa den dokter west har.

En nou, noa joaren, wait ik het.

k Har nait docht, dat k nog zo veul op pepier kalken kon.

**Harma Lanting**

Oet: "Aigen waark"  
Cursus Grunneger toal ien Noordhörn  
Jannewoarie – maai 2006





## Optaikens van n grootmoe

### Veurwoord

Nooit har k waiten dat grootmoe wezen joe zoveul plezaaier geven kon en joen leven opschieren sol as je op leeftied kommen.

Ons veurnemen om in t Grunnegers wat te goan schrieven komt mie krekt te pas, den net om dis tied har k der over docht om de gutege oetbedenkseltjes van mien klaaindochter op te taiken.

En woarom den nait in t Grunnegers. K vang den twij muggen in ainmoal.

Ons oldste ootjezegger is as k aan t optaiken begun, twij en n vörrel joar old. Zie het net n lutje zuske kregen en zie het om dizze tied n neefke van sikkom ain joar old. In n kört pooske begunt dij keuteldoemke te teuten as k wait nait wat. Grode lu mouten doar den om lagen en dat vaalt sumtieds nait goud. "Nait grapke" ropt zie den mit n kwoad vertrokken smoeltje.

Al gaat het schrieven mit gemarrel en gesparrel, k vin t de muite weerd. k Hoop dat joe der van mitgenottern willen, den hebben joe geliek wat ommaans.

Grootmoe Giny

### Dail ain.

Klaaindochter is op veziede bie heur grootmoe.

Dij het krekt heur pottenpaanderij aan kaant moakt en roemt de boudel weer op. t Lutje wicht zugt aal dij romtommelderij en kiekt heur oogkes oet, den in heur nijmoodse hoesholden thoes ken zie dij nait.

“ Grootmoe is dat joen taandenbozzel ? “

vragt zie en wiest noar de bozzel op schuddelbaank.



## Niks gebeurd en toch....

Drij dingen stoen vandoag op t programmoa: aaijer hoalen op boerderij, bie taande laangs ien t verpleeghoes en din noar kroug bie diek om n rondje te geven omdat mien eerste column ever ploatst wordt. Eerst noar pa zien zuster dij heur leste joaren ien t olle dörp slit, heurent en mienent. Ain van deuren ien gaang staait haalf open. Zuster vragt: "Heje n schone broek aantrokken, vraauw Aldershof?"

"Zo voak huft dat toch nait", heur ik n tegenstem.

"Elke dag n schone broek aan, vraauw Aldershof", zegt zuster.

Oet ooghouk zai k persoon dij aansproken wordt mit n mooi blomkesklaid aan.

Taande is goud te spreken. Het wel ais minner west. Wie proaten over familiedingen. As ze heurt dat k meer plannen heb, jagt ze mie sikkom vot. Boeten kom k vraauw Smit tegen. Dat Willem der west het, vertelt ze. Ze zee tegen hom dat e der goud aan dee zien olle moeke op te zuiken. t Was toch allemoal regen, haar Willem onwilleg zegd. Vraauw Smit kikt wat meer tillevisie nou bainen nait meer willen. Elke noamirreg zigt ze *Boldjeboeren* om haalf zes. Doar is n haile minne kerel bie.

Bie t olle stee laangs rie k noar t noorden. Neuteboom staait nog altied ien onnerwaal. As kiend bin k van plaank òf donnerd ien t wodder. Mit kreus op kop kroop ik te sloot oet en dat ien hoes. k Verbeel mie dat ik t hoongelach nog heur. Boeten t dörp draai k t roam open. Aal meer baauwlaand. k Roek een siepelgewas. Op t stuk bie brug kon wel facelia stoen. Mooi gezicht as dat straks lila bluit. Veul waait is eerste iendruk. Dij wiede lucht over t oetgestrekte laand. Ien de verte is diek aal te zain. k Rie wadlopersree op en stop bie boerderij links. De man dij hier woont, bin k mit noar legere schoul west. Wie hemmen kanners moeke kend. As k noar diek wil, goa k hier even aan veur n proatje en n kopke thee of zo. Net as zienent ston ons loadere boerderij aan binnendiek. Dus waren wie aigelk burenen. Veul sjauwen bie n kanner doan. Ik krieg n stieg aaijer mit. Hai het n

keer n swoaneaai veur mie regeld. Dij wol k beschildern veur Poask. Mit ienholt van dat aine aai kon k grode cake bakken. Nait dat er ain was dij hom pruiven wol as k over swoan vertellen dee. Dij siepelderij onnerwegens het bieslook west en t rokt noar praai krieg k nog te heuren.

Din snidder ik mit n flinke gang bie Noordpolderkanoal laangs noar kroug onder aan zeediek. k Schoef deur open. Gelagkoamer gonst van geroezemoes. Veur k bie stamtoavel bin, heb k aal hail wat heurd en zain. Serveerster brengt kovvie.

"Lekker", ropt n kerel.

"Mos òfwachten", jeuzelt zai.

"Even noar plee", zegt n man.

"t Is broen", zegt e.

"Hai staait er veur", is t antwoord.

"Wat veur geloof hemmen nije bewoners", wil ain waiten.

Buurman nimt tied om noa te denken. Din zegt e:

"Ik denk Hervormd. Ze goan tenminsent nooit noar kerk".

Op dizze dag zit er altied n vaste groep woar k n enkele keer bie bin. Doudestieds haar ik groot woord. Nou baaide columns aannomen binnen is t mie mooi tou om te tracteren. Der komt ain aanzetten mit n grode puut genoaten. Wel wat hemmen wil betoalt en krigt zien dail. *As der aans niks is, is genoat ook vis*, bedenk ik. Nog even zeelucht opsnoeven op diek. Borkums widde gebaauwen glaenzen ien zun. t Wordt tied om weerom te goan. Over landwegkes rie k noar Stad tou. Thoes kiek ik ien gids. *Boldjeboeren* keek vraauw Smit toch elke dag noar om haalf zes? k Zai t aal: *The Bold and the Beautiful*. Niks gebeurd en toch n mooie dag had.

**Siet Bootsman**

Groningen, 21 juni 2006.

## KOATSEBALE AAN ONGKOOL

Terry Rist haar n minne dag, alles mishottjede. Dat begon smörgens vroug al bie t aanklaiden. Toun e handgrenoat aan schoune plakde, trok e de pinne deroet zunder dat hai der bie noadocht. Nou, binnen de körtste keren was e kloar wakker. n Knal! Sloapkoamer haildaal in puun en zien linkeronderbain lag krekt in de wasbakke, dij verinneweerd haalfweg trappen hong. Dat köstte hom hail wat muite om dat onderbain weer goud onder de knije te kriegen. Lopen gong nog wat swoar, mor dat zol wel bie trekken. Noa zien bord mit Brinta gong Terry op pad noar veld bie Dörpsstee. Der mos stunt worden mit de grode feesttente, mor ding was al vot.. Op t sportveld laip allenneg nog n manske dij ol pepier verzoamelde. Hai keek Terry ais aan en zee: "As je wat willen, mout je wel op tied kommen". Doar kon t mitdoun. Op noar de brogge over t kenoal, dij mos e opbloazen. Haar ook wel wat, dij feestelk verlichte fietsvleugels dij over d'ol wasknieperfebriek hinzailen. Of dat brogwachtershoeske dat bie Avalon deel kwam. Haren ze votdoadelk n portiersloge... Mor ook dat was gain sukses, brogge ston steevast omhoog en der wazzen aalweg minsen om tou, t leek wel n mieghummelbult. Terry was nou even bilder, zöchde mit zien GSM Super 3a60 kontakt mit gehaime sentroale, onderbrocht woaraargns in n olde beunker.

"Hallo sentroale, vroag van koatsebale aan Ongkool: as t gain drij uur is en t regent ook nait zoas veurzegd, wat mout koatsebale din oet stee zetten?"

Ding pruttelde as opoes kovviekane, gong dou over op sizzen en soezen en wur rompslomps stil. "Gain beriek" kwam der in beeld.

"Wel gommesnogaantou, mit wat veur rötzooi hemmen ze mie nou weer opzoadeld?" Terry was der zat van, stinzat. Hai gong op hoes aan. Hai haar nog gain tien meter lopen, toun e n gesis en geknal heurde achter hom.

Veraltereerd keek e noar brogge woar dikke swaarde rook vanof kwam. Bliksem sloug der nait in, mor deroet, drij, vaaier

moal. En dou zag e ain van de fietsvleugels deur de locht soezen richten Zeuvensteerns en t brogwachtershoeske kwam deel bie ingang van jeugdhonek, twij roeten in diggels, mor wieder goud gezond. Terry muik dat e vot kwam. Bie "Welgelegen" huil Wubbo hom tegen. Of t al heurd haar? Grode feesttente dij kortsleden bie de Dörpsstee ston, was de locht invlogen aargens in de Vraise Wouden. Störmwind kreeg de schuld, mor Terry haar zo zien twiefels. Hou kon dat nou? Thuus dee e votdoadelk zien sloffen aan en pakde veur alle wizzegheid nog n bord mit Brinta. Dou gong telefoon: "Sentroale. Ongkool veur koatsebale, wat e nou weer verhapstukt haar...." Terry vreef zok nog ais stief in d'ogen. Zien linkeraarm lag verdacht dicht in de buurt van de wekker, deken haar e oftrapt, loaken zat strak om zien rechterknije bonden. Hai vong nog net wat op van nijsberichten op wekkerradio: "Vanmorgen is in het Groninger dorpje....."

Jan Blaauw  
Noordhörn, 21/06/2006

# REMKES, KOMT DER NOG WAT VAN??????

In t Dagblad van 23 juni lestleden ston n verhoal van Piter Bergstra over t oetblieven van erkennen veur de streektoal deur onze regeren. Ploug van Balkenende het t zo drok mit t intrekken en weeromgeven van paspoorten, blift gain tied over veur t optillen van streektoalen noar n hogere "status". JP was hier in Grunnen n pooske leden, mor dat gong meer om t ophemeln van Eemshoaven en Bavaria en t ontlopen van Piet van Dijken. t Kin wezen dat JP toal van Piet verslit veur streektoal, mor nait in de smiezen het dat t Nedersaksisch n groot gebied bestrikt en dat Piet doarin n klaaine "enclave" vörmt mit zien Stroatsaksisch. Johan Remkes (Binnenlandse Zoaken, doar valen we aal onder omreden t eerdgas nog nait op is) holdt boot of en nou willen bobo's in t streektoalgebied n verzuik richten aan Twijde Koamer. Of dij t minder drok hemmen din ministers? Vaalt te betwiefeln, mor nait schoten is aaltied mis. In 1996 wör t Nedersaksisch deur regeren erkend as "minderheidstaal". Dat betaikende promoosie oet t verdomhoukje noar twijde devizie van t Europees Handvest. Bobo's binnen nou verplicht om streektoal te behouden, nou ja, ze mouten t in elks geval perbaaiern. En de gebroekers maggen nait diskrimmeerd worden. Nou is der ook n éérste Handvestdevizie, doar zit in Nederland allenneg mor t Vrais in. Grunnegers willen noatuurlek nóg n moal promeveren, zai binnen nait minder ja, en Drenten en Twenten helpen heur doarmit. Doar zit nou krekt de kneep. Deputeerde Hans Gerritsen, dij veur Grunnen aanvoerdersbaand om zien aarm het, vindt dat t Grunnens nou al zo staark is, meer din eerstedevizieweerdeg. Mor Remkes leuft doar gain barst van. Hai tou Grunnen oet en din zol t mit t Grunnens veul beter goan din veurheer? Bestaait ja nait. Nee, t Grunnens mout eerst mit kop

en scholders in twaide devizie der bovenoet steken en din kieken we mit Sint Juttemis wel ains weer. En doar gait onze liberoale Johan, al weer n bok schaiten in Twijde Koamer, wat het dij man t drok. Me dunkt, wie mouten zulf mor ains wat meer aan de bak mit ons Grunnegers. Op dij noam van t stadion bievöbbeld, Euroborg, kinnen vanzults zunder muite twij stippen, oftewel twij voetbaaltjes. Henk Bartelds op Knoal kin deuzen vol plakplootjes drokken mit "Remkes, komt der nog wat van?" en "Remkes, steek kop boven t wotter". n Aksie mit haite stroombraifkes noar Binnenlandse Zoaken zit ook in de piepliene. Wat ook goud meugelk is dat we koppen bie mekoar steken en mit n aksietraain noar Den Hoag soezen, dij superbuss van Ockels ridt ja nog nait. In traain moaken we der n gezellege boudel van, t woord gezellig verstaait elkenain. (Wia Buze achter de tap, Jungle Warriors van Jan Kuper in veurste woagen, Deputeerde Hans Gerritsen mit zien saksefoon of mondörgel as begelaaidend koartjesknipper, Groenbroek en Engels mit Boukenkist achterin, doar is wel wat van te moaken). Veur JP nemen we n poar ekstroa kratten Bavaria mit, spandouk derbie: "In Grunnen mout meer kinnen/kennen/kunnen" en op noar t Binnenhof. Ik heb der wel vertrauwen in, kampioen binnen we al laank mit onze 39 punten, wie haren van de regeren der mor 35 vanneudens. En aans mout onze joker Simon Reker nog mor ains op batterij kommen. t Grunnegers gait Europa in, wis en woarachteg. En wie willen betere arbiters, en eernse bobo's, dal maalloagen mout nou mor ains doan wezen. Kom op, Grunnen(s), loat die nait kennen, wel érkennen!

M. Olle Bone

.....

**Volgende KREUZE komt der zo tegen 1 september 2006. Biedroagen? Groag! Veur 26 augustes t spul noar [JanBlaauw@hetnet.nl](mailto:JanBlaauw@hetnet.nl), of in buzze bie Verl.Oosterweg 33, 9804 RD Noordhorn. Prettege vekansie!**